


S Militäär macht duurchus Sinn  
und isch fir mänge Bueb e Gwinn.  
Woo wottsch denn sunscht uff däären Äärde  
e richtig staargge Käärl wärde?  
Wichtigs leersch fir s ganzi Lääbe  
dass de kaasch noch Groossem strääbe.  
Im Wald versteegge - deggt und taant  
wie me Kameraade waart.  
Zuugschuel doo - Kampfbaan deert  
alles hesch bim Lefti gleert.  
Aane seggel - will s bresiert  
het ze mängem Waarte gfiert.  
Der Kommandant - esoone tolle  
het fraid an jeeder Mat-Kontrolle  
Stiifel butze - Inspeggzioone  
sinn alles alti Dradizioone.  
Doch lang nimm alli wärde gnoo  
nit jeede daarf deert aane goo  
denn d Armee het au zem Zyyl  
gspaart mues wärde - zimli vyyl.  
Drum duet men anderscht kalkuliere  
noch neie Maasstäab regutriere  
drei ganzi Dääg muesch jetze draa  
sunscht hesch dy Chance grad scho ghaa  
denn schnäller als de dy kaasch bsinne  
hesch der UT-Stämpel dinne.  
S haig schynts aine resymiert  
ep s am Änd nit doch rendiert



*Woo macht die Sach denn wietgellig Sinn?  
Isch es der erseentli Gwinn?*

*So zimli alles isch fir nyt  
im Militäär do kunnsch nit wyt.*

wemmer nämmlí zwai, drei mee  
mit dääne Stämpel dien versee  
koschte die uns kaini Frangge  
doorderfir miest me ne dangge  
und zaale denn - daas isch der Hit  
grad no an de Keschte mit.

Doch stimmt dy Yysatz und dy Graft  
bisch gsund und au in vollem Saft  
denn kaasch der soowyt sicher syy  
jetze bisch au duu derby!  
Ab sofoort kaasch der aaber s Dängge  
achzää Wuche gänzlig schängge.

D Entschaidige im Militäär  
sinn iirgendwie nur halb so schwäär.  
Denn alles wiird der deert befoole  
gang d Schue go butze - s Gweer go hoole.  
Au e Bläänlis isch scho gmacht  
wie vyyl pfuisse muesch pro Nacht.

Säggs Stund mien s ab sofoort syy  
do kaasch nuur hoffe schloofsch grad yy  
und hesch mool Haiwee z Nacht im Bett  
do miecht y glatt die greeschi Wett  
denn springt der Fäldi in dy Zimmer  
sunscht wiird s am Ändi als wie schlimmer

und dermit de nimm muesch gryne  
stellt er der e Lämpli yyne.  
Am näggschte Moorge - s isch der Waan  
e groosse Maarsch stoot uff em Blaan  
doch dää duet jeeden iiberstoo  
mit Ruggewee muesch nimme koo.

E digge Koffer kaasch drum haa  
dää het jetz nämmlí Reedli draa.  
Und die sinn scho en ächti Gfoor  
jeensys vom Kasäärnedoor  
vo linggs, vo rächts - gryz und gweer  
blooge sy der ganz Verkeer.

Au bim Panzerfaare mues me luege  
sunscht grootet s pletzlig us de Fuege.

Wenn aine brämost - der ander faart  
und dää bim luege denn grad spaart  
dätscht er em ins Fuudi yyne  
fangt denn sofoort aafou gryne.

«Y haan en gaar nit richtig gsee  
und d Byyle macht mer zimli wee!»

Do maint der Kadi «Y bi eerlig  
so Unfall find y schampaar gfeerlig!»

Pletzlig het er die Ydee  
d Panzer mues me besser gsee  
sofoort het er Faarbe ghoolt  
und d Panzer rosaroot bemoolt.

Spannend wiird s wenn denn uff s mool  
meergsch em Kadi isch nit wool.

De frogsch dy waas en soo duet gwäale  
sinn s d Maschiiningweer wo fäale?

Woo sinn die hii - waas isch basiert?  
Het am Änd ain die entfiert?

S Gländ wiird doch die ganzi Nacht  
vo Soldaate sträng bewacht!

Und pflichtbewusst hänn die bim jasse  
strigkeit noch jeeder gspilte Passee  
dermit au kaine eppis stiilt  
aimool sträng duur s Fänschter gschiilt.



*Mer hänn is doodruff äärnschhaft gfragt  
währ denn in de Hoose hoggl!*

*bisch im Dienstl der staarggi Maas.  
oder...*

# *H... Häimmer denn e Reggli aa? //*